

氣之鴻濛。乘飛霆而跨箕尾兮。與汗漫而相期。紛屬車之驟乘兮。駕六龍而逶迤。酌匏尊以自觴兮。鑒天漢之流源。挾須彌而納芥子兮。恒遊戲於其間。形骸付於電泡兮。變詭幻之奇服。亂焦螟於蚊睫兮。騁蝸角之蠻觸。何鄉其無上下兮。樂容與而澹忘歸。回車獨來兮。忽何所見。宛在水之中。坻乘雲與寶璐兮。儼黃冠而葛巾。狹一世邈無人兮。吾將自棄於魚鳥。窺游鱗之闊萍兮。送飛鴻之西矯。湛揚揚其獨存兮。鬱山林之深渺。馳余神於霄夢兮。徑從公而往遊。搏扶搖之九萬兮。歷九疑而望崇丘。俯黃州之舊邦兮。雪堂岌乎臨臯。望東坡之美人兮。枕灘流而漱松醪。哀余癯以好脩兮。使哺啜其醕糟。覺遽然涕垂膺兮。像漠乎其無言。有無變化吾誰執兮。莽其乘風雲而上天。誦斯文以卒歲兮。猶足以續遠遊而賦超然者也。**劉將孫養吾集**送彭希呂遠遊序。古之人。蓋未有安居而為士者也。豈惟歷聘之世為然。後之言士者。類不講於古今之故。第以結軫馳騁者為游士。而游幾若士所諱。不知古之所謂士者。往往皆爾。鄉舉里選一定。其為士。未有不升之朝著。交於天下士者也。惟科舉行。士始有不出鄉者。然亦惟東南百餘年。偏安土著使然。當其盛時。如歐陽公。二蘇公。皆驅馳跋履。執質四方。八至于京都。各取開封解送。皆非舉於廬陵。舉於眉山也。